

# Skýrsla framkvæmdaráðs um starfsárið 1993 - 1994

Framkvæmdaráð Kvennalistans skal samkvæmt starfsreglum skipað minnst fimm konum, og á hver angí rétt á fulltrúa í ráðinu. Í reynd sitja þar yfirleitt konur úr Reykjavík og Reykjanesanga, svo og ein þingkona og starfskonur Kvennalistans. Hlutverk framkvæmdaráðs er m.a. að sjá um daglegan rekstur Kvennalistans, styðja við starfsemi anganna, aðstoða við skipulagningu stórfunda og ráðstefna, hafa yfirumsjón með fjármálum Kvennalistans og styðja við bakið á starfshópum.

## Landsfundur að Löngumýri

Ellefti landsfundur Kvennalistans var haldinn að Löngumýri í Skagafirði 5. - 7. nóvember 1993. Konur í Norðurlandi vestra önnuðust undirbúning og framkvæmd, nema að framkvæmdaráð skipulagði dagskrána að mestu. Fundinn sóttu um 80 konur. Þar voru m.a. samþykktar breytingar á lögum og starfsreglum Kvennalistans, sem höfðu það að markmiði að koma meiri festu á starfið og efla almenna virkni. Frásögn af landsfundi birtist í 11. tbl. fréttabréfsins 1993, svo og ályktanir og skýrsla um starf Kvennalistans.

## Samráðsfundir urðu fjórir

Með breytingum á lögum og starfsreglum Kvennalistans, sem samþykktar voru á landsfundinum í nóvember 1993, var komið meiri festu á samráð anganna. Nú sitja í því 2 kjörnir fulltrúar frá hverjum anga, auk þingkenna og varapþingkenna. Pessar hafa atkvæðisrétt, en starfskonur, sem einnig eru í samráði, hafa þar málfrelsi og tillögurétt, og sama gildir að sjálfsögðu um aðrar kvennalistakonur, sem kjósa að sækja samráðsfundi. Fulltrúar anganna eru kjörnir til árs í senn, og ber þeim skylda til að kynna niðurstöður samráðs fyrir öðrum konum í sínum anga.

Samráðsfundir urðu 4 á starfsárinu. Þeir voru haldnir 22. janúar, 19. mars, 5. maí, og 20. ágúst. Á marsfundinum voru m.a. samþykktar reglur fyrir angasjóð, sem hefur það hlutverk að styrkja starfsemi anganna. Styrkirnir eru m.a. veittir vegna kostnaðar við ráðstefnur og fundi, við útgáfu og dreifingu á efni til kynningar á Kvennalistanum og vegna kostnaðar við ferðir vegna funda. Fundurinn í maí var símafundur, en það fyrirkomulag sparar fé og tíma og þykir hentugt, ef um afmarkað málezni er að ræða.

## Sveitarstjórnarkosningar í maí

Kvennalistinn kom mikið við sögu í sveitarstjórnarkosningunum, sem fram fóru í maí. Sérlistar voru í boði á Ísafirði, í Kópavogi og Hafnarfirði, en á nokkrum stöðum höfðu kvennalistakonur samflot við einn eða fleiri flokka. Samtökin styrktu fjárhagslega þau framboð, sem félagsfundir viðkomandi anga samþykktu sem framboð á vegum Kvennalistans. Samþykkt var í samráði að verja til þessa 2.5 millj. kr., sem skipt var eftir ákveðnum reglum, og leggja 500 þús. kr. í varasjóð, ef á þyrfti að halda. Hvert framboð átti rétt á 125 þús. kr. lágmarksupphæð og viðbótarfamlagi miðað við fjölda kjósenda á hverjum stað. Nokkur framboðanna nýttu ekki allan sinn rétt, og ekki þurfti að ganga í varasjóðinn, en fyrir öll framboðin skiptu þessi fjárfamlög verulegu máli. Hins vegar hefur orðið misbrestur á því að framboðin gerðu grein fyrir ráðstöfun fjárins samkvæmt skilyrðum, sem samráð setti.

Kvennalistinn á Ísafirði fékk konu kjörna í bæjarstjórn og sömuleiðis Kvennalistinn í Kópavogi. Þrjár kvennalistakonur náðu kjöri af R-lista í Reykjavík, ein af blönduðum lista á Húsavík, ein á Selfossi, ein á Seltjarnarnesi og ein í Biskupstungnahreppi. Þá voru kvennalistakonur kjörnar óhlutbundinni kosningu í a.m.k. 6 hreppum á landinu.

## Vorþing á Selfossi í júní

Vorþingið var haldið á Selfossi 3. - 5. júní, og sóttu það 60 - 70 konur úr öllum öngum. Meginefni vorþingsins var staðan að loknum sveitarstjórnarkosningum og undirbúningur undir næstu alþingiskosningar. Niðurstöður umræðna voru þær, að ekkert bent til þess að dregið hefði úr þörfinni fyrir sérframboð kvenna með áherslu á bætt kjör kvenna og barna, aukið lýðræði í stjórmárháttum og meiri skilning og virðingu fyrir umhverfi okkar og náttúru.

## Nordisk forum í ágúst

Fjölmargar kvennalistakonur sóttu Nordisk forum 1994, sem haldið var í Finnlandi 1. - 6. ágúst, og var mikið að gera við undirbúning vikurnar á undan. Útbúinn var kynningarbás, þar sem gestir gátu fræðst um sögu og starf Kvennalistans í máli og myndum og fengið bæklinga, penna, spil og barmmerki í veganesti. Kvennalistinn hélt tvo kynningarfund, annan á skandinavísku, en hinn á ensku, þar sem saga, starf og stefna Kvennalistans var kynnt. Þá héldu íslenskar, sænskar og finnskar konur sameiginlegan fund um kvennalistaframboð. Þótti framlag Kvennalistans takast vel, þótt viðbrögðin væru ekki jafn góð og á Nordisk forum í Noregi 1988, enda Kvennalistinn ekki lengur jafn nýstárlegt fyrirbæri. Frá þessu öllu segir í 8. tbl. fréttabréfsins.

## Kvennalistakonur á faralds fæti

Þýskar konur efndu til ráðstefnu 13. 11.1993 til undirbúnings kvennaverkfalli 8. mars í Þýskalandi. Þær höfðu ályktað sem svo, að eitthvert sögulegt samhengi hlyti að vera á milli kvennafrídagsins á Íslandi 1975 og Kvennalistans og báðu því um kvennalistakonu til að fræða sig um ástæður, undirbúning og framkvæmd kvennafrídagsins og um ástand kvennamála á Íslandi nú. Þórildur Þorleifsdóttir fór á þeirra fund í Kassel í Þýskalandi og sagði frá ferðinni og ráðstefnunni í 1. tbl. fréttabréfsins á þessu ári.

„Konur og stjórnmál“ var yfirskrift ráðstefnu, sem haldin var í Vilnius í Litháen í desember 1993. Markmiðið með ráðstefnunni var m.a. að ræða leiðir til að efla þátttöku kvenna í stjórnmálum í Litháen, og þess vegna lék þeim forvitni á að heyra um þá leið, sem íslenskar kvennalistakonur hafa farið. Sigrún Jónsdóttir flutti þeim tölu um það efni og svaraði ótal spurningum í kjölfarið.

Í mars sótti Þórunn Sveinbjarnardóttir ungliðaþing Norðurlandaráðs í Svíþjóð fyrir hönd Kvennalistans, og er það í þriðja sinn, sem Kvennalistinn sendir fulltrúa á slíkt þing. Þórunn sagði frá ferð sinni í 4. tbl. fréttabréfsins.

## Ausið úr sjóðum fræðslubankans

Nokkrar konur tóku sig til að áliðnum vetri og stofnuðu fræðslubanka Kvennalistans. Fyrsta verkefnið - og ennþá það eina - var samning fræðsludagskrár um Kvennalistann, sögu hans, hugmyndafræði, skipulag og starfsemi. Fyrsti fræðslufundurinn var í Reykjavík í apríl, annar í Borgarnesi í júní og sá þriðji á Ísafirði í september. Og þó að starfsárinu hafi lokið 30. september, sakar varla að geta þess, að fræðslubankinn heimsótti Selfoss, Vopnafjörð, Egilsstaði og Breiðdalsvík í október og Höfn í Hornafirði í nóvember.

## Laugardagskaffið sívinsæla

Laugardagskaffi Kvennalistans er löngu búið að skapa sér hefð. Reykjavíkurangi hélt því úti í mörg ár, en nú skiptist umsjón á milli anganna í Reykjavík og á Reykjanesi. Þar var á starfsárinu m.a. rætt um konur í karlasporti, heilsu kvenna, þróunaraðstoð, skrif um Kvennalistann, gyðjuna og kvenöndina, karlaskýrluna, starfsmat sem lykil að bættum lífskjörum kvenna, breytingaskeiðið, ástina og hjónabandið og máttugar meyjar.

## Útgáfumál

Kvennalistinn gefur út mánaðarlegt fréttabréf auk Veru, tímarits um konur og kvenfrelsi. Í nóvember kom svo út veglegt blað í tilefni 10 ára afmælis Kvennalistans. Það bar nafnið Pilsapytur og var borið inn á hvert heimili í landinu. Þá var gefinn út nýr bæklingur um Kvennalistann á íslensku, dönsku og ensku. Var það orðið löngu tímabært, því alltaf er mikið beðið um upplýsingar um Kvennalistann, bæði innan lands og utan.

---

Framkvæmdaráð hefur fasta fundartíma 2. og 4. fimmtudag hvers mánaðar kl. 16.30 á Laugavegi 17 og oftar, ef nauðsyn krefur. Eigi konur erindi við framkvæmdaráð, geta þær gengið að því vísu á þessum tímum. Skrifstofa Kvennalistans á Laugavegi 17 er opin virka daga kl. 15-18.